

АЪМОЛИМИЗ ЁИНКИ МУРОДИМИЗ

Маълумдурки, дунёда хар ким умид ва аъмол ила яшайдур. Кеча-кундуз меҳнат ва машаккат тортмок оянда учундур. Хар ким ўз ояндасини яхшиликка харакат этар ва келар замонда ўз орзуси ва хавасига етмок учун ҳеч дам олмасдан хол кадаринча харакатдадур. Тириклик кулфати ва меҳнати асносинда хар ким ўз ояндаси ва истикболига бир нав яхши умид ила караб ва ўзига бир муддао карор бериб ва ўшал муддао ва ёинки муродин хосил килмок учун кўшиш этиб, хар кун чекатурган кулфатини ўшал муддаосини хосил килдирмок учун ўзига олмай яна зиёдарок интиладур. Ва баъзан ўшал муруду муддаосини, гўё хосил бўлди, деб рохатланиб ўзига тасалли берадур. Ва ҳеч ахади ушбу муддаоу мурудни оркасидан югурмокдан холи эмас. Ана шул муддао ва мурудларни илми ислох ила аъмол дерлар.

Энди аъмолимизга диккат килмок керак. Аксар халкимизни аъмоли шулки, ишласа ва фойда килса. Шоядки, ўгил ва кизини тўй килса ва хам кандай! Ўз каториндаги одамларни килган тўйидан зиёдарок!

Бечора косибни аъмоли тўйдур. Ўзи рохат юзи кўрмайдур. Кеча-кундузки 18, балки 20 соатни меҳнатга ўткаратургон косибларимиз бордур. Хаккинча емайдур, киймайдур. Ўн ва йигирма саналар меҳнат ва машаккат этар ва худодан ўгил тилар, тўй килмок учун. Ана, бечорани аъмоли. Йигирма саналик меҳнати уч кун тўйда тамом. Яна Ахмад порина хавли ва хона гирад. Тўй мусрифти учун карз эгаларидан кочадур. Катта тўй килиб хотун олгон бир кисм бечораларни холига йигламок керак. Уч кунлик тўйни азоси баъзи оилаларда ўн йил, хатто, бир умр сурар, балки беватан ва хонавайронликга сабаб бўлур. Бир косибни акду никохига, тўю обрўсига минг сўм. Бир ўртахол учун 2000 ё 3000 сўм. Нимбой учун тўрт-беш минг сўм керак. Бу сўмларни юздан етмиш беши ейилиб-ичилиб... кетар.

Бу сўмлар аслинда кимники эди? Бонка, фирма, фойдахўрники. Табиий, буларга пулларини бермок лозим, на берилур? Богу хона ва уйи ичиндаги асбобни сотиб бермок керак. Бечора келин ва куёвни кўрпа ва либосигача сотилур, карзхохга берилур. Нимбойлар синар. Тириклинда бўлмаса, ўлганда синар. Ахлу аёли дарбадар бўлур. Ой, бу нима? Тўгриси, бир нав девоналик эмасми? Субхоноллох, карз олиб халкга ош бермок аклсизлик эмасми? Хамда илллати бедавосидур.

Хар киши бир уйланса ва сўнгра оиласидан бир ўлук кўмса, оллохи акбар. У хона ахли косиб бўлса, бу дунёга ўзига келмасдан кетар. Холо, баъзи бечора ўлса, ани бой кариндошлари, обрў килурмиз, деб сагир молини халкга эллар ила йиртиш, палов килиб берар. Бечора сагирлар нонини бой кишилар кўлтугига олиб кетар. «Ло такулун амволил ятима. Кулун ва ишрабу ва ло тасрафу»[1], канда колди?..

Эй мусулмонлар, бу ояту масъалаи шаръига ким амал килур? Ва муни халойикга ким билдурар? Хар кун бир мусулмонни нимарсалари бозорга дини учун... сотилур. Ва хар кун судда накадар ховли, хона, бог сотилур. Хар кун накадар векселлар «протест»,

накадар дўкон, корхона хажз (печать) бўлур. Бу ниманинг жазоси? Тўй, маърака, Тазия, кўпқари, базм. Бир махаллада ахли савод йигирмадан бир йўк. Имони исломни далиллари ила билатургонларни нари кўйдук. Эрта козилар бархам бўлса, замонча кози бўлатургон биргина киши бутун ўн миллиўн Туркистонда йўк... Йўк, яна йўк.

Хой, хой, халойик! Бизлар девонами сог? Албатта... Биз тўй ва маърака хаёлидан лаззат олардук. Тўю маъракамиз ила фахр килар эдук. Тўю маъракага сарф килинатургон окчани жамламок иа ё кўлга киргузмок учун харакат этардук. Агарда тўй ва маъракага кадимгидек окча тўкмасак, ул окчани на килмок керак? Мунга жавоб берилурки, тўй ва маърака килинсун. Аммо хозиргидек исроф этмасдан килинсун. Ва мумкин кадаринча кичик килинсун. Ва ортукча пул ила болаларни мусулмон ва руси яхши ўкутулсун. Тўю маъракага сарф килинатургон окчани эски мадраса ва мозору масжид хамда мактабларни шикаст-рехтларига сарф килинсун. Тўй ва маърака окчасидан болаларни хукумат мактабларига берилсун ва бу окчадан талабаларни Макка, Мадина, Миср, Истанбулга ва Русия дорилфунун ва дорулсаноатларига юборилиб диний ва дунёвий ва замоний одамлар етишдурмокга саъй килинсун.

Бизни Туркистонда муаллим оздурки, тўю маъракага сарф килинатургон окча ила Кафказ, Кирил, Урунбург ва Козонга усули таълим ўрганмок учун бола юбормок керакдур. Хукумат мактабларига кирмок учун русча билмок ва имтихон бермок лозим. Ва бу имтихонни бермок учун хар болани икки сана русча ўкутуб, тарбият этмок керак. Ва бул икки сана учун хар бир болага 600 сўм акча керакдур. Акчалик оталар, албатта, тўй ва маъракага кизгонмаганларидек, болани ўкутишга хам кизгонмасалар керакдур. Болалар учун тарбиятхона (пансион) очмок керак. Ва бу тарбиятхоналар замонча ва хам миллий ва диний рухда бўлиши керакдур. Бу тарбиятхоналарни очмок учун ва хукумат мактабларига бола тайёр килмок учун нашри маориф ёинки жамияти хайрия ва ёинки тарбияти атфол жамияти ва ё ўзга исм ила, хулоса, жамиятлар керакдур. Токи бул жамият(лар) халкдан окча жамлаб миллат болаларини ўкутиш ва миллатни ояндаси учун керак бўлатургон кози, яъни судья, закунчи, яъни хукукшунос, инжинер, яъни мухандис, муаллим, яъни замона мактабдори, миллатни хомийси ва ходими, яъни Давлат Думасига депутат, миллий саноатхоналаримизни ислох ва ихё этгувчи, яъни техник, тижоратхона ва бонкаларда бизга ёрдам бергувчи, яъни тижорат илмини ўкугон коммисант, шахар думахоналарига ва минбаъд Туркистонда очилатургон земства идораларинда бизни тарафдан кириб ва сайланиб, биз учун, ватани Рус учун, дин, мубаййини ислом учун, зауфо учун, фукаро учун ишлайдургон одамларни етушдурмок керакдур.

Хозирги мўйсафидларимиз турсун, ўрта ёшлар якинда ўлиб кетар, замона хар куни янгилашур. Янги илм ва янги фикрлик ва фунуни замонияни дарбар килган одамларни талаб килур. Букундан бошлаб, хар шахардан хар сана ўн-йигирмалаб хукумат мактабларинда бола берилса, ўнбеш сана сўнгра хар шахарда 4—5 замона одами тайёр бўлур ва хукумат мансабларига, замона доираларига, тижорат ва саноатхоналаринда кириб, бизларга манфаат еткурар. Келар замон бошқадур. Хатто, хозирда иккимиз урушсак, яхудий ва ажнабий закунчиларига борурмиз. Бошимиз огриси, ажнабий дўктурига борурмиз. Сабаб надурки, ўзимиз ўкуб замоний одам бўлмаймиз? Ана энди биз учун тўй ва маърака ва кўпқари ўрнинда шул юкоридаги айтулгон ишлар аъмол — идеал — мурод — тилак — муддао бўлсун. Вало, мун(и)сиз биз кундан кун йўк ва забун

бўлармиз.

«Ойна» журнали, 1913 йил, 6—7-сонлар, 130—132, 154—156-бетлар.

[1] Таржимаси: «Етимнинг молини еманглар. Енглар, ичинглар, исроф килманглар».